

Uunga siunnersuut: Avatangiisit innarlitsaaliorneqarnissaannik Inatsisartut inatsisaata allanngortinneqarnera

Nunalerinermut, Imminut Pilersornermut, Nukissiutitut Avatangiisinullu Naalakkersuisoq)

Akissuteqaat

(Nunalerinermut, Imminut Pilersornermut, Nukissiutitut Avatangiisinullu Naalakkersuisoq)

Aappassaanneerpeqarnera

Naalakkersuisut sinnerlugit Eqqissimatitsinermut Avatangiisinullu Ataatsimiititaliaq kajumittumik inatsisissatut siunnersuutip suliarineqarneranut qutsavigaara.

Eqqissimatitsinermut Avatangiisinullu Ataatsimiititaliaq oqaaseqaatinik pingasunik aalajangersimasunik saqqummiivoq, taakkualu matumani akissuteqarfigissavakka.

Siullermi § 40 a-mut, Naalakkersuisunut suliniutinik Inatsisartut inatsisaanni aalajangersakkani allani pineqartunut ilaatinneqanngitsunik aallartitsinissamik piginnaatitsisumut, tunngassuteqarpoq.

Ataatsimiititaliaq siullermik pingaarnertullu pisunut § 40 a-p atorneqarfissaatut naatsorsuutigineqartunut assersuutitut apeqquteqarpoq. Aalajangersagaq pisunut takorloorneqariinngitsunorpiaq sammitinneqarmat, pisunut aalajangersakkap atorneqarfissaattut naatsorsuutigineqartunut aalajangersimasunik assersuuteqarnissaq ajornakusoorpoq.

Aatsaat takorloorneqariinngitsunut sukkasuumik akuliunnissaq pisariaqartinneqarpat, aalajangersagaq taanna atussavarput. Ataatsimiititaliap § 40 a-mut atatillugu piffissamut killiliussaqaq naleqquttoq pillugu apeqqut qaqqippaa. Piffissamut killiliussaqaq pillugu apeqqummut tunngatillugu, § 40 a-p atorneqarnera sapinngisamik naleqquttumik piffissalerlugu pisassasoq isumaqatigilluinnarpara. Tamanna atuutereerpoq, taanna akuliunnerit atorneqartut aammalu mianerisassat anguniakkallu akuliunnermut pineqartumut tunngavilersuutigineqartut imminnut naapertuuttumik oqimaqatigiissinneqarnissaat pillugu pisortat ingerlatsineranni inatsisini nalinginnaasumik annertoqqatigiissitsinissamut tunngaviusoq takuneqarsinnaavoq.

Aamma § 40 a-p atorneqarnerani taarsiinissaq taarsiissutitalimmillu arsaarinnissuteqarneq pillugu apeqqut ataatsimiititaliap qaqqippaa. Taarsiinissaq aamma taarsiissutitalimmik arsaarinnissuteqartarneq pillugit apeqqummi annertoqqatigiissitsinissamut tunngaviusoq qitiulluinnartumik inissisimasussaavoq. Taarsiinissaq imaluunniit taarsiissutitalimmik arsaarinninnissaq pilersinnaalluni pisoqartillugu, ingerlatanut mingutsitsisartunut akuliunnissaq inuiaqatigiit soqutigisarisussaavaat, tassalu taarsiinissap imaluunniit taarsiissutitalimmik arsaarinninnerup sunniutissaannit pingaarnerusussaalluni. Tamanna suliani ataasiakkaani tamaginni aalajangerneqartartussaavoq.

Oqaaseqaatip aappaa § 59 a-mut tunngassuteqarpoq. Tassunga tunngatillugu paasisstississutigisinnaavara, akuersissutinik, akuersissuteqarnernik aammalu immikkut ittumik akuersissuteqarnernik tunuartitsinermut atatillugu suliasamik suliarinninnermut aalajangiinernullu tunngavissalimmik tunngavilersuuteqarneq tunngavigineqartussaammata aammalu pisortat ingerlatsineranni inatsisini tunngaviusut nalinginnaasut malillugit suliarineqartussaalluni. Tamatuma ilaatigut malitsigisaanik sukkasuumik akuliunnissaq pisariaqartinneqarnerasoq, ilanngullugu avatangiisinut soqutigisat pingaarutillit eqqarsaatigalugit, aallaavigalugu piffissamut naapertuuttumik killiliisoqartussaavoq.

Oqaaseqaatit pingajuanni inatsisissatut siunnersuutip kalaallisoortani § 1, nr. 9-imi ”-sinnaavoq” aamma ”-ssaaq” oqaatsitigut iluarsinissaannut tunngassuteqarpoq. Oqaatsitigut iluarsinerit

Avatangiisit innarlitsaaliorneqarnissaannik Inatsisartut inatsisaata allangortinneqarnissaa pillugu Inatsisartut inatsisaannut siunnersuummut allannguutissatut siunnersuummi allanneqarput.

Naalackersuisut maluginiarpaat ataatsimiititaliap isumaqatigiittup siunnersuutip akuerineqarnissaa inassutigigaat. Taama oqaaseqarlunga Naalackersuisut sinnerlugit siunnersuutip saqqummiunneqartup ilusimisut iluseqarluni pingajussaanneerseqartussangortinneqarnissaa inassutigissavara.